



琴軒集



【明】

陈

璉著

琴軒集

（附杨宝霖辑佚）

重刻琴軒集卷第十八

序

送戶部侍郎郝公致仕序

戶部左侍郎山西太原徐溝郝公今年春正月秩盈四考壽介七旬考績于朝上引年之請

皇上念其老不欲重煩以事許其致政給驛而歸文武縉紳莫不以爲榮本部員外郎襄陽楊銘等謁文爲贈予與公相知有素奚靳於一言乎公質直敦厚篤志詩書躬行禮義有古人風

洪武中發身胄監歷戶禮二部郎中勤敏有爲譽聞遐邇三十
五年夏 太宗文皇帝嗣膺寶曆慎選天下方岳之臣是年秋
八月公拜湖廣布政司左叅政旣下車克盡宣布之道恩敷惠
流政績甚茂由是名徹 天聽召拜今官夫戶部卽周之地官
而侍郎實爲其亞會稽事劇出納孔殷非幹時通才弗克典領
公敷歷中外有年練達庶務清直寡欲安分自然不專聲威務
存大體凡所當職者靡弗力爲之至若錢穀金帛具知其數量
入爲出而制國用經制之政旣優廉介之操益勵清名重望聞

于兩京人方期公陟高位秉大政廣推惠澤均于四海豈意遽
上引年之請而孤衆人之望哉今祇承 寵命歸榮鄉邦茂膺
康寧和平之福其樂有不可勝言者然古之君子懸車致政其
心不忘乎君若宋富文忠公趙清獻公雖致仕于家未嘗已於
言焉公素蘊忠誠必將同富趙二公之爲也審矣予因自新等
之請故特述公操履之詳遭際之盛復以富趙二公之事以期
待焉亦朋友忠告意也於是乎書

送刑部侍郎俞公致仕序

國家著令凡仕年及七十者許其致仕 恩至渥也刑部侍郎
寧波象山俞公士吉去年秋以年耄上書乞致政 詔允之今
年十二月自北京回東歸有日禮部尚書兼 華蓋殿大學士
張公等屬文贈之予聞大夫七十而致事禮也夫幼學壯行功
成名遂壽介七袞孰不欲懸車引年如唐尚書白居易之爲然
有能遂其願者幾人哉公在洪武中選拜監察御史陞貳內臺
正色立朝紀綱振舉及出守襄陽叅政山東恩敷化流民被惠
澤後陟詹事改今官輔導之職旣優明刑之譽益著永樂初嘗

持使節於日本治水利於東吳竣事而回克稱上旨純誠勁
操爲列聖所知方諸古人可謂無媿一旦以稀年致政有
合禮經縉紳君子莫不誇而榮之此尚書諸公所以屬文爲贈
也雖居易之榮奚以過哉復聞宋叅政趙槩致仕居睢陽者十
有五年猶讀書著文自適愛國之誠惓惓弗已集古今諫諍爲
諫林一百二十卷奏之爲人主嘉納公年雖邁而精神不少衰
他日到家不徒爲居易之樂尚能爲叅政之忠豈不重有光於
吾道乎

思菴文集序

文者振道之華也道本諸心散諸事物感物而後動因言而後
宣光輝發越自不可掩然當主之以理充之以氣又貴乎學之
有本也故不言則已言之則理達而詞暢譬有源之水其流愈
遠而愈不竭汨汨滔滔汪洋澎湃百折而達于海者其本盛故
也彼口耳之學於道無所聞於氣無所養其言澆漓叢雜義乖
而理晦奚足以振道之華哉都察院僉都御史姑蘇吳公間以
思菴前後二集見示得其文與詩讀之言論迪乎道義興致本

乎風雅正大之氣和平之音藹然可見蓋公生于東吳文獻之
邦所相與者悉鴻儒碩士得於見聞講論尤多於六經子史靡
弗研究會衆理而融諸心而履諸已宜其道無往弗著文詞之
工特餘事耳吳中學校交聘爲學者師俱辭不就惟以飲水著
書爲樂永樂季年膺薦 召至京師未及擢用 仁廟御極首
拜廣西道監察御史正色立朝卓有風采而冰蘖之操益勵嘗
巡歷浙江貴州二道弘攄所蘊以達諸政凡有論奏出人意表
威惠兼著吏民敬畏猶神明焉逮陟都臺德望旣隆勳名益著

而其道之見乎事業者又昭焯如此豈但著於文詞而已哉尚
期以光明正大之學黼黻皇猷匡弼盛治則道益尊德益盛而
功益著斯集之傳殆將與之同爲不朽也其前集著於未仕時
後集著於已仕日復有續集則載任都臺時所作者嗚呼可謂
盛乎公間屬予序深愧學殖荒落不足以當之然荷公相知之
厚義不可辭因書此俾讀者知公學有源委所作一本於理而
充以氣誠足以振道之華也公名訥敏德其字思菴乃別號云

送廣東沈大叅詩序

今天下方面重地十有三廣東其一也統郡邑七十餘所土地
綿亘數千里海外諸番則有安南占城暹羅真臘琉球三佛齊
之屬國初以來膺使憲藩屏之任者皆朝廷碩德重望以
故教化聿興風俗丕變和氣潛通歲嘗大稔無風魚之災水旱
厲毒之患黎民熙熙皞皞注涵泳大平此誠方面大臣克體

淵衷而盡撫綏之道也京口沈公經近以內艱服闋有廣東布
政使司叅政之命公素蘊忠貞之德抱經濟之才蚤受知

太祖高皇帝日侍左右眷遇益隆尋拜山西叅議居久之轉廣

西叅議功德皆可稱道及是命在廷公卿大夫莫不以方面得人賀而且慶廣東之人蒙福也於是相率賦詩以慰公南行之思而屬余序夙與公相知最深不可以固陋辭因書此以弁羣玉之首

送張通判之臨安序

古者郡有守丞尉守治民丞佐之尉典兵而通判之置則始於宋藝祖乾德中所以倅貳郡政凡兵民錢穀戶口賦役獄訟聽斷之事咸得理之所部官有善否及職事修廢亦得舉刺以聞

我朝每府置通判一員以佐郡政嘗慎選其人焉今年夏四月四川重慶張鑑由國子生擢雲南臨安府通判臨安爲雲南極邊西控元江車里東挹儂獠南與安南相犬牙挽牽索引之民椎髻卉服之衆素號難治國朝洪武十四年始通中國朝廷遂以其地置州郡與內地等於是官其土著爲下所信服者爲郡邑正貳倅之職皆中州文學之士邇年以來民遷善變其獷戾之習漸有華夏之風豈非倅貳得人所致歟今鑑之往可不惟生民之不易恩命之非常而竭忠殫赤以答聖

天子之深眷哉於其行因舉古郡官建置之由與臨安風俗之異以告之庶日望其政之有成也

送澄邁劉知縣序

昔余典教桂林與劉煦子溫有師生之好後入成均脩其舊學今年春出爲瓊州澄邁知縣因拜而請曰煦承教先生有年今蒙聖恩賜七品秩以臨乎民夙夜祇畏未知所以爲之願賜一言以爲規余嘉其善請因語之曰邑宰朝廷所重也以勞進者率十餘年而後得非固難之良以才出乎一邑之人

乃可膺一邑之寄敷歷之久而有以成之也今子一命爲宰非
固易之蓋天官以子學識超乎等夷也今挾是以往可不大其
設施乎余聞澄邁居海島中土瘠民貧而俗儉朴人知禮畏法
素稱易治然爲上者當因其俗而化之寬而不至於弛威而不
至於劇與其過於威寧過於寬所謂平易近民民必親之古之
人以循良稱者亦豈外是道哉余喜子溫忠厚有志古道他日
聞有善政得民著聲明時爲桂林增重者蓋有望焉

自得齋文集序

昔余讀陳衆仲所爲珮玉齋類藁序則知元翰林侍制江寧楊先生志行一門父子文學行義之懿竊景慕之永樂初余由國子助教出守滁陽時先生諸孫節仲亦被薦守徐州去年夏節仲由雲南大理府知府九載考績至吏部適予亦自滁陽秩滿來一見踰平生歡今年春二月節仲以年耄致仕余則叨膺四川憲長之任因出平昔所爲文一編請予序予惟節仲以穎悟之資承家庭之學年未弱冠已著才名後寓襄陽隱居樂道浩乎自得不汲汲於希世求合而嗜學之志益堅其在襄陽則有

隆中雜著其知徐州則有彭城類藁其守大理則有滇南類藁
總而名之則曰自得齋集試閱其一二粹然根之以義理賁之
以英華考覈精詳議論正大貫穿縱橫無施不可是雖家學薰
染固有所自亦其得於天者異於人宜所作超乎等夷也及仕
明時荐歷州府發其所蘊措之政事吏民從化治績著聞跡古
循良可謂無媿豈特文章哉於戲當前代盛時先生父子以文
學行義表著江東今節仲旣能傳其家學復能以政事著聲天
朝豈不有光于先生耶昔衆仲之序云積之久者其發遲約於